

ACCION 21 confrontando problema ni ocho dia despues di eleccion

EN realidad mescos cu AWEMainta a muestra den su edición di ayera mainta, cu líder di e partido Miguel Mansur, no por hunga pa Hulk c'un solo asiento manera el a bin ta haciendo for di momento cu contamento di voto a caba, pero cu e tin cu sinta keto y mira kende lo yama su persona pa forma un coalicion.

Un asiento nunca por ta mas cu 2 asiento di tanto MAS como RAIZ, tampoco un asiento ta mas cu 7 asiento di partido AVP y sigur un asiento di Mansur nunca por ta mas cu 9 asiento di partido MEP y por lo tanto a muestra cu lo ta bin e sinta keto den skina, spera cu su nomber lo wordo yama pa bin dilanti.

For di diaranson anochi caba a tuma nota di intercambionan riba rednan social cu lo tin un diferencia di opinion den seno di e partido aki, caminda ta cuestiona e forma con e líder Miguel Mansur a bin ta atendiendo e rol cu e partido tin cu bay hunga den posibel formacion di un Gobierno di coalicion.

Informacion extra oficial cu AWEMainta a ricibi, ta muestra cu candidato number dos riba e lista di Accion 21, Daphne Lejuez, lo no ta mucho contento cu e forma di procede di su lider y lo a haci esaki conoci tambe na su persona.

Un remarca cu no a cay den mucho bon tera pero cu lo a conduci na un confrontacion te cu Miguel Mansur lo a haci mencion cu e partido tin cu pasa den un proceso di reorganisa e partido, loke ta straño mirando cu apenas e partido tin algun luna cu el a wordo funda y apenas 8 dia pasa, a participa den e proceso electoral, caminda a logra di haya un asiento den Parlamento. Daphne Lejuez ta conoci cu e ta para pa loke ta ta kere cu rectitud y integridad, caminda den su periodo como miembro di fraccion di MEP den Parlamento, el a vocifera su posicion contra di e manejo di e tempo ey Minister di Infraestructura Otmar Oduber.

Un posicion cu no a haci'e mucho popular den su partido MEP y cu consecuentemente a pone Daphne dicidi di declara su mes independiente retirando for di partido geel.

Como politico Daphne a muestra un persona cu caracter cu ta para pa loke e ta kere aden y kisas ta mesun observacion tambe cu AWEMainta a haci desde cu resultado di eleccion a bira conoci, caminda tres partido chikito ta insisti cu ta nan ta determina ki Gobierno ta sinta y cua partido nan ta scoge pa bay goberna cune. Resultado di eleccion ta pone nan den e posicion aki, pero si tanto nan ta papia di integridad, di papia di 'good governance' sin duda e forma di atende cu un situacion politico real cu tin n'e momentonan aki, tambe tin cu cumpli cu e standard existi pa ta un persona integro.

Partidonan chikito tur a papia di un cambio, a papia pa kibra cu e tradicion politico, pero un biaha mas pueblo votador a duna e partidonan tradicionalista aki casi 70% di e total di voto, cu sin duda ta un cifra hopi impactante y t'e dos partidonan tradicionalista aki tin cu yama e chikitonan pa bin sinta papia pa mira na ki acuerdo lo por yega.

Pero sinta hunga duro c'un of dos asiento, no t'e forma corecto, no ta cuadra den concepto di integridad, pa partidonan chikito kere y actua mescos cu nan ta esnan mas grandi den ultimo eleccion.

Apesar cu Daphne Lejuez mes no a duna un declaracion ainda t'e lider di ACCION 21 a dicidi di duna cierto declaracion na prensa y ta papia di un opruiming den e partido y aunke cu e no a menciona nomber, ta muestra cu probablemente e problema ta cu Daphne. Si ACCION 21 dicidi di forma coalicion, den cualkier coalicion y Miguel Mansur lo dicidi di entrega su asiento den Parlamento pa bira Minister, e tin cu corda cu loke a pasa cu Marisol kende bandona su asiento den Parlamento como miembro di POR, huramenta como Minister pa despues wodo manda cas y kedando man bashi.

Asi Mansur bira Minister ta keda na Daphne pa bay Parlamento como number dos riba lista y e posibilidad lo ta grandi cu den caso di un conflicto serio, e lo por huramenta como miembro di fraccion di ACCION 21 pa despues dicidi di bira miembro independiente den Parlamento.